

# CYNGOR SIR YNYS MÔN

## Cofnodion y cyfarfod a gynhaliwyd ar 14 Mai 2015

- PRESENNOL:** Y Cynghorydd Vaughan Hughes (Cadeirydd)  
Y Cynghorydd Jim Evans (Is-Gadeirydd)
- Y Cynghorwyr Lewis Davies, Richard Dew, Jeff Evans, Ann Griffith, John Griffith, Derlwyn R. Hughes, Kenneth P. Hughes, Trefor Ll. Hughes, W.T. Hughes, Llinos M. Huws, Aled M. Jones, Carwyn Jones, G. O. Jones, H. Eifion Jones, Raymond Jones, Richard O. Jones, R. Llewelyn Jones, R. Meirion Jones, Alun Mummery, R. G. Parry, OBE, Dylan Rees, J. Arwel Roberts, Peter Rogers, Alwyn Rowlands, Dafydd R. Thomas, Ieuan Williams.
- WRTH LAW:** Prif Weithredwr,  
Cyfarwyddwr Dysgu Gydol Oes/Darpar Brif Weithredwr,  
Cyfarwyddwr Cymuned (*ddim yn bresennol ar gyfer eitem 16*)  
Pennaeth Swyddogaeth Adnoddau/Swyddog Adran 151 Dros Dro, Pennaeth Busnes y Cyngor/Swyddog Monitro,  
Pennaeth Gwasanaethau Democrataidd (*ddim yn bresennol ar gyfer eitem 18*),  
Pennaeth Proffesiwn (AD)(ar gyfer eitem 18)  
Rheolydd Gwasanaethau Cyfrifeg Dros Dro (*ddim yn bresennol ar gyfer eitem 18*),  
Rheolydd Gweithrediadau AD (ar gyfer eitem 18)  
Swyddog Pwyllgor (ATH) (*ddim yn bresennol ar gyfer eitem 18*).
- YMDDIHEURIADAU:** Y Cynghorwyr Victor Hughes, Nicola Roberts.
- HEFYD YN BRESENNOL:** Mr. Michael Wilson (Cadeirydd y Pwyllgor Safonau) (ar gyfer eitem 11).

---

### 1. COFNODION

Cyflwynwyd cofnodion y cyfarfodydd o Gyngor Sir Ynys Môn a gynhaliwyd ar y dyddiadau a nodir isod a chadarnhawyd eu bod yn gywir:

- 26 Chwefror 2015
- 30 Mawrth 2015 (arbennig)

## **2. DATGANIAD O DDIDDORDEB**

Mewn perthynas ag eitem 18 ar y rhaglen, dywedodd y Cynghorydd R. G. Parry OBE ei fod wedi cael caniatâd arbennig i siarad ar y mater ac y byddai felly yn aros yn y Siambr am y drafodaeth ond na fyddai'n pleidleisio ar y mater. Gofynnodd am eglurhad ynghylch a oedd angen iddo felly wneud datganiad o ddiddordeb.

Mewn perthynas â'r Aelodau hynny a chanddynt ddiddordeb yn eitem 18 oherwydd bod aelod o'u teulu yng nghyflogaeth Cyngor Sir Ynys Môn ond sydd wedi cael caniatâd arbennig i gymryd rhan yn y drafodaeth, dywedodd Pennaeth Busnes a Swyddog Monitro'r Cyngor y pery angen i'r aelodau hynny ddatgan eu diddordeb. Cadarnhaodd bod y caniatâd arbennig yn parhau i fod mewn grym.

Gwnaed datganiadau o ddiddordeb wedyn gan yr aelodau a ganlyn mewn perthynas ag eitem 18 gan gadarnhau y byddent yn cymryd rhan yn y drafodaeth ar y mater ar ôl cael caniatâd arbennig i wneud hynny ond na fyddent yn pleidleisio:

Lewis Davies, Llinos Medi Huws, Trefor Lloyd Hughes, H. Eifion Jones, Alun Mummery, Richard Owain Jones, R. G. Parry, OBE, Dafydd Rhys Thomas, John Arwel Roberts, a Ieuan Williams.

## **3. DERBYN UNRHYW GYHOEDDIADAU GAN Y CADEIRYDD, ARWEINYDD Y CYNGOR NEU'R PRIF WEITHREDWR**

Gwnaed y cyhoeddiadau a ganlyn gan y Cadeirydd:

- Llongyfarchiadau i Mr. Albert Owen am gael ei ailethol fel yr Aelod Seneddol ar gyfer Ynys Môn.
- Llongyfarchiadau i bob un o blant ysgol yr Ynys a oedd wedi cystadlu dros y penwythnos yng nghystadleuaeth chwaraeon genedlaethol yr Urdd.
- Dymuniadau gorau i bawb a fydd yn cystadlu yn Eisteddfod Genedlaethol yr Urdd yng Nghaerffili ddiwedd mis Mai.
- Llongyfarchiadau i Glwb Ffermwyr Ifanc Llangejni a ddaeth i'r brig yn Rali Ffermwyr Ifanc Ynys Môn dros y penwythnos.
- Dymuniadau gorau i bawb a fydd yn cystadlu yn Eisteddfod Môn yn Ysgol Syr Thomas Jones y penwythnos nesaf.
- Dymuniadau gorau i bawb a fydd yn cystadlu yn Sioe'r Gwanwyn yn Llanelwedd dros y penwythnos.
- Cydymdeimlir a theulu'r Henadur Mrs M. A. Edwards MBE o Parc Glas, Bodorgan a fu farw ym mis Mawrth yn 103 oed. Rhoddodd Mrs Edwards oes o wasanaeth cyhoeddus i'r Ynys ac roedd yn parhau i fod yn llywodraethwr yn Ysgol Bodorgan. Roedd wedi cyflawni'r rôl honno am 75 o flynyddoedd.
- Estynnir cydymdeimlad yn yr un modd i deulu'r cyn-Gynghorydd R. L. Owen o Fiwmares. Mr. Owen oedd Cadeirydd y Cyngor Sir o 2002 i 2003 a gwasanaethodd ar Gyngor Bwrdeistref Ynys Môn yn ogystal â'r Cyngor Sir.
- Estynnir cydymdeimlad hefyd i unrhyw aelod o'r Cyngor neu ei staff a oedd wedi cael profedigaeth.

Safodd yr Aelodau a'r Swyddogion mewn distawrwydd fel arwydd o gydymdeimlad a pharch.

#### **4. CWESTIYNAU A DDERBYNIWYD YN UNOL Â RHEOL 4.1.12.2 Y CYFANSODDIAD**

Gofynnwyd y cwestiwn isod y cafwyd rhybudd ohono gan y Cynghorydd R. Meirion Jones i'r Cadeirydd:

*Hoffwn ofyn cwestiwn i'r Cadeirydd ynglŷn ag anogaeth i gadw enwau Cymraeg ar dai Ynys Môn.*

*Gwelwyd yng Ngheredigion yn gynharach eleni y Cyngor yno yn datgan ei anogaeth i gadw enwau Cymraeg ar dai. Teimlais y dylem ni ym Môn fod yn gwneud yn debyg. Gwyddwn fod y Prif Weithredwr yn gefnogol i'r syniad ac iddo godi'r mater yn y Fforwm Iaith Sirol a chysylltais efo swyddogion. Erbyn hyn rydym wedi derbyn gwybodaeth mewnol ac o Gyngor Ceredigion. Gwyddom hefyd fod y Bil Cynllunio o flaen y Cynulliad ar hyn o bryd. Hoffwn i'r Prif Weithredwr adael i ni wybod beth yw'r sefyllfa bresennol ynglŷn â'r mater a sut mae ef yn gweld y ffordd ymlaen i gael y maen i'r wal.*

*Mae Grŵp Plaid Cymru yn gefnogol i'r egwyddor ac eisiau amddiffyn ein treftadaeth ac felly eisiau gweld Cyngor Sir Ynys Môn yn datblygu polisi ar y mater, ac rwy'n gofyn y cwestiwn hwn ar ran y Grŵp."*

Yn ei ymateb dywedodd y Prif Weithredwr nad oes gan yr Awdurdod rym statudol i orfodi enwau tai ar anheddau preifat. Er bod gan y Cyngor awdurdodaeth dros enwau strydoedd, nid yw hynny'n ymestyn i dai preifat er bod ymgyrch gan rai aelodau o Lywodraeth Cymru i ymgorffori darpariaeth o'r fath o fewn Mesur Cynllunio (Cymru) 2014. Mae nifer o enwau tai yn Ynys Môn yn rhan o dreftadaeth ddiwylliannol yr Ynys a gellir olrhain llawer ohonynt yn ôl ganrifoedd ac mae ganddynt ystyr a phwrpas. Ar hyn o bryd gall yr Awdurdod geisio perswadio ei ddinasyddion i barchu a pheidio â newid enwau Cymraeg ar dai fel y mae'r Cyngor yng Ngheredigion yn ei wneud. Cafwyd trafodaethau gyda Phrif Weithredwr ac Arweinydd Cyngor Sir Ceredigion sydd wedi rhoi i'r Awdurdod hwn enghreifftiau o'r pro-fforma y mae'n ei ddefnyddio a'i bolisi ar y mater.

Er mwyn rhoi sylw i'r mater argymhellodd y Prif Weithredwr y dylid, yn gyntaf, ei gyfeirio i Grŵp Tasg Iaith y Cyngor i lunio argymhellion a pholisi penodol i'w cyflwyno i'r Pwyllgor/Pwyllgorau perthnasol trwy sianelau democrataidd arferol, ac yn ail, fod y Cyngor yn ystyried wedyn a yw'n dymuno cefnogi'r ymdrechion o fewn Llywodraeth Cymru i gynnwys darpariaeth ym Mesur Cynllunio (Cymru) 2014 i'r diben hwn, a chyflwyno sylwadau i'r perwyl i Lywodraeth Cymru. Cymeradwywyd yr argymhellion gan y Cyngor fel ffordd o symud y mater yn ei flaen.

**Penderfynwyd bwrw ymlaen yn unol ag argymhellion y Prif Weithredwr.**

## 5. CYFLWYNO DEISEBAU

Yn unol â pharagraff 4.11 y Cyfansoddiad cyflwynwyd deiseb gan Arweinydd y Cyngor ar ran disgyblion Ysgol Gyfun Llangefni a defnyddwyr y Cwrs Golff yn galw ar Gyngor Sir Ynys Môn i ailystyried ei benderfyniad i gau Cwrs Golff Llangefni yn Ebrill 2015 ac i ohirio ei gau tan o leiaf diwedd Medi 2015 i ganiatáu amser un ai ar gyfer ffurfio menter gymdeithasol neu i nodi prynwr i redeg y cyfleuster fel cwrs golff. Dywedodd yr Arweinydd bod dyfodol Cwrs Golff Llangefni yn destun adroddiad a fydd yn cael ei ystyried gan y Pwyllgor Gwaith yn ei gyfarfod ar 26 Mai 2015.

**Penderfynwyd nodi y bydd y mater yn cael ei drafod gan y Pwyllgor Gwaith yn ei gyfarfod ym mis Mai.**

## 6. DOGFEN GYFLAWNI FLYNYDDOL (CYNLLUN GWELLA) 2015/16

Cyflwynodd yr Aelod Portffolio ar gyfer Busnes Gweithredol, Trawsnewid Perfformiad, y Cynllun Corfforaethol ac Adnoddau Dynol adroddiad y Rheolwr Rhaglen a Chynlluniau Busnes i'r Cyngor yn ymgorffori'r Ddogfen Gyflawni Flynyddol ar gyfer 2015/16.

Dywedodd yr Aelod Portffolio ar gyfer Busnes Gweithredol, Trawsnewid Perfformiad, y Cynllun Corfforaethol ac Adnoddau Dynol fod y Pwyllgor Gwaith, yn ei gyfarfod ar 20 Ebrill 2015, wedi penderfynu fel a ganlyn ar ôl rhoi sylw i'r Ddogfen Gyflawni Flynyddol ar gyfer 2015/16:

- *Awdurdodi'r Swyddogion, trwy'r Aelod Portffolio ar gyfer Trawsnewid Perfformiad, y Cynllun Corfforaethol ac Adnoddau Dynol i ymgymryd â'r dasg o gwblhau'r drafft terfynol;*
- *Argymhell bod y Cyngor llawn yn ei gyfarfod ar 14 Mai 2015 yn mabwysiadu'r Ddogfen Gyflawni Flynyddol ar gyfer 2015/16.*

Gofynnodd y Cynghorydd Peter Rogers am eglurhad ar y cyfeiriad yn y Ddogfen Gyflawni i'r bwriad i drosglwyddo rheolaeth Cwrs Golff a Llain Ymarfer Llangefni i sefydliad rheoli arall tan Ebrill 2017 o gofio bod penderfyniad ar weithrediad y cwrs golff a'r llain ymarfer tan 2017 wedi ei wneud ond yn seiliedig ar ystyriaethau eraill. Ymatebodd yr Aelod Portffolio ar gyfer Datblygu Economaidd, Hamdden a Thwristiaeth trwy ddweud bod yr adroddiad ar Gwrs Golff Llangefni a gyflwynir i'r Pwyllgor Gwaith ar 26 Mai yn ystyried model rheoli sy'n cynnwys y gymuned ond sy'n parhau i lynu wrth y penderfyniad gwreiddiol.

**Penderfynwyd mabwysiadu'r Ddogfen Gyflawni Flynyddol (Cynllun Gwella) ar gyfer 2015/16.**

## 7. NEWIDIADAU CYFANSODDIADOL – RHEOLAU GWEITHDREFN CONTRACT

- Cyflwynodd yr Aelod Portffolio ar gyfer Busnes Gweithredol, Trawsnewid Perfformiad, y Cynllun Corfforaethol ac Adnoddau Dynol adroddiad i'r Cyngor a baratowyd gan Bennaeth Busnes/Swyddog Monitro'r Cyngor yn ymgorffori Rheolau Gweithdrefn Contract newydd yn Atodiad 1.

- Dywedodd yr Aelod Portffolio ar gyfer Busnes Gweithredol, Trawsnewid Perfformiad, y Cynllun Corfforaethol ac Adnoddau Dynol fod y Pwyllgor Gwaith, yn ei gyfarfod ar 16 Mawrth 2015, wedi penderfynu fel a ganlyn ar ôl rhoi sylw i'r uchod:

*Argymhell i'r Cyngor Sir llawn ei fod yn cymeradwyo'r Rheolau Gweithdrefn Contract newydd ac yn dirprwyo awdurdod i'r Swyddog Monitro ymgorffori'r Rheolau Gweithdrefn Contract newydd yn y Cyfansoddiad.*

Dywedodd y Pennaeth Busnes/Swyddog Monitro fod y Cyngor, wrth fabwysiadu'r rheolau Gweithdrefn Contract newydd, yn gwneud hynny gyda'r amod na fyddant yn cael eu gweithredu tan fis Medi 2015 oherwydd eu bod yn rhan o raglen fwy o newid.

Cadarnhaodd y Cyngorydd R. Meirion Jones fod cwestiynau yr oedd ganddo ar y Rheolau Gweithdrefn Contract newydd wedi cael sylw mewn canllawiau a ddarparwyd gan Bennaeth Busnes y Cyngor a'i staff.

Gofynnodd y Cyngorydd R. Llewelyn Jones am eglurhad ar baragraff 4.9.9.2.5(d) yn y Rheolau Gweithdrefn contract newydd o ran argaeledd gwybodaeth am dendrau dan ofynion y Ddeddf Rhyddid Gwybodaeth er budd tryloywder ac agoredrwydd.

Dywedodd Pennaeth Busnes y Cyngor fod y paragraff perthnasol yn tanlinellu'r ffaith y gellir cyflwyno ceisiadau i'r sector cyhoeddus am wybodaeth dan y Ddeddf Rhyddid Gwybodaeth ond nad oedd modd gwneud yr un peth yn y sector preifat. Mae'r darpariaethau yn y paragraff yn cyfeirio at yr enghreifftiau hynny lle mae'r Cyngor yn tendro gyda'r sector preifat i ddarparu gwasanaeth ar ei ran ac yn egluro i'r sector preifat, o'r cychwyn cyntaf, fod yr un gofynion o dan y Ddeddf Rhyddid Gwybodaeth yn berthnasol iddo yn yr amgylchiadau hynny ag sy'n berthnasol i'r sector cyhoeddus.

**Penderfynwyd cymeradwyo'r Rheolau Gweithdrefn Contract newydd fel yn Atodiad 1 i'r adroddiad gan Bennaeth Busnes/Swyddog Monitro'r Cyngor a dirprwyo awdurdod i'r Swyddog Monitro ymgorffori'r Rheolau Gweithdrefn Contract newydd o fewn y Cyfansoddiad fel eu bod yn dod i rym ym mis Medi 2015.**

## **8. NEWIDIADAU CYFANSODDIADOL – CYLCH GORCHWYL Y PWYLLGOR ARCHWILIO**

- Cyflwynodd yr Aelod Portffolio ar gyfer Busnes Gweithredol, Trawsnewid Perfformiad, y Cynllun Corfforaethol ac Adnoddau Dynol adroddiad gan Bennaeth Busnes/Swyddog Monitro'r Cyngor yn ymgorffori Cylch Gorchwyl newydd y Pwyllgor Archwilio.

- Dywedodd yr Aelod Portffolio ar gyfer Busnes Gweithredol, Trawsnewid Perfformiad, y Cynllun Corfforaethol ac Adnoddau Dynol fod y Pwyllgor Gwaith, yn ei gyfarfod ar 20 Ebrill 2015, wedi penderfynu fel a ganlyn ar ôl rhoi sylw i'r uchod:

*Penderfynwyd argymhell i'r Cyngor llawn ei fod yn cymeradwyo'r newidiadau i Gyfansoddiad y Cyngor, sef cylch gorchwyl newydd ar gyfer y Pwyllgor Archwilio fel y caiff ei nodi yn yr Atodiad i'r Adroddiad.*

**Penderfynwyd cymeradwyo'r newidiadau i Gyfansoddiad y Cyngor, sef cylch gorchwyl newydd ar gyfer y Pwyllgor Archwilio fel y caiff ei nodi yn yr Atodiad i'r adroddiad gan Bennaeth Busnes/Swyddog Monitro'r Cyngor.**

## **9. NEWIDIADAU CYFANSODDIADOL – PWERAU'R PRIF WEITHREDWR**

Cyflwynodd yr Arweinydd adroddiad Pennaeth Busnes/Swyddog Monitro'r Cyngor yn gofyn am awdurdod i newid y Cynllun Dirprwyo.

Dywedodd yr Arweinydd fod y Pwyllgor Gwaith, ar ôl rhoi sylw i'r mater yn ei gyfarfod ar 20 Ebrill 2015, wedi penderfynu:

*Penderfynwyd argymhell i'r Cyngor llawn:*

- Ei fod yn gwneud newidiadau i'r Cyfansoddiad fel y gall y Prif Weithredwr wneud newidiadau strwythurol i'r Cynllun Dirprwyo i Swyddogion heb fynd drwy'r Pwyllgor Gwaith a'r Cyngor llawn.*

- Ei fod yn rhoddi'r awdurdod i'r Swyddog Monitro weithredu'r newid drwy ychwanegu paragraff newydd i'r Cynllun Dirprwyo yn unol ag Atodiad 1 ac wedi hynny, i weithredu unrhyw benderfyniadau perthnasol gan y Prif Weithredwr.*

**Penderfynwyd newid y Cyfansoddiad fel bod modd i'r Prif Weithredwr wneud newidiadau strwythurol i'r Cynllun Dirprwyo i Swyddogion heb fynd trwy'r Pwyllgor Gwaith a'r Cyngor llawn a bod y Swyddog Monitro'n cael ei hawdurdodi i weithredu'r newid trwy ychwanegu paragraff newydd i'r Cynllun Dirprwyo yn unol ag Atodiad 1, ac i weithredu unrhyw benderfyniadau perthnasol wedyn gan y Prif Weithredwr.**

## **10. PWYLLGOR ARCHWILIO – ADRODDIAD BLYNYDDOL 2014-15**

Cyflwynwyd yr Adroddiad Blynyddol Archwilio Mewnol ar gyfer 2014/15 gan Gadeirydd y Pwyllgor Archwilio.

**Penderfynwyd nodi'r adroddiad gan Archwilio Mewnol ar gyfer 2014/15.**

## **11. ADRODDIAD BLYNYDDOL Y PWYLLGOR SAFONAU 2014-15**

Cyflwynwyd Adroddiad Blynyddol y Pwyllgor Safonau ar gyfer 2014/15 i'r Cyngor gan Mr Michael Wilson fel Cadeirydd y Pwyllgor Safonau yn ystod 2014/15. Roedd yr adroddiad yn crynhoi sut 'roedd y Pwyllgor Safonau wedi cyflawni ei Raglen Waith ar gyfer 2014/15 ac yn gosod ei raglen gweithgareddau ar gyfer 2015/16.

Mewn ymateb i gais am eglurhad ar y camau oedd yn cael eu cymryd i bontio'r bwlch rhwng Cynghorau Cymuned a'r Cyngor Sir ar adeg pan oedd mwy a mwy o

ddisgwyliadau ar Gynghorau Cymuned, adroddodd Pennaeth Busnes y Cyngor/Swyddog Monitro fod y maes datblygu a hyfforddi dan y Côt Ymddygiad wedi canolbwyntio yn 2014/15 ar glercod Cynghorau Tref a Chymuned. Roedd nifer wedi mynychu'r hyfforddiant hwn a bu derbyniad da iddo ac mae tystiolaeth ei fod wedi adeiladu perthnasau rhwng y Cyngor Sir a Chynghorau Cymuned. Yn 2015/16, bydd y Cyngor yn defnyddio dull yn seiliedig ar risg gyda'r bwriad o ddarparu hyfforddiant pellach i Gynghorwyr Tref yn arbennig.

Cyfeiriodd Arweinydd y Cyngor at ddarpariaethau eraill er mwyn cryfhau'r berthynas a'r cyfathrebu rhwng y Cyngor Sir a chynghorau tref a chymuned ar ffurf Siarter/Memorandwm o Ddealltwriaeth, Fforwm deirgwaith y flwyddyn dan gadeiryddiaeth Arweinydd y Cyngor ac yn deillio o hynny, Grŵp Ffocws i drafod ac ymgynghori ar faterion ehangach.

**Penderfynwyd nodi'r Rhaglen a gyflwynwyd gan y Pwyllgor Safonau rhwng Ebrill 2014 a Mai 2015 fel mae wedi ei chynnwys yn Atodiad A yr adroddiad a chefnogi Rhaglen Waith y Pwyllgor Safonau ar gyfer 2015/16 fel y mae wedi ei chynnwys yn Atodiad B.**

## **12. ADRODDIAD BLYNYDDOL SGRIWTINI 2014-15**

Cyflwynwyd Adroddiad Blynyddol y Pwyllgorau Sgriwtini ar gyfer 2014/15 i'r Cyngor gan y Cynghorydd R. Meirion Jones fel Cadeirydd y Pwyllgor Sgriwtini Corfforaethol yn ystod 2014/15. Roedd yr adroddiad yn gosod y cyfraniad a'r her a ddarparwyd gan Sgriwtini trwy raglenni gwaith y Pwyllgor Sgriwtini Corfforaethol a'r Pwyllgor Sgriwtini Partneriaeth ac Adfywio yn ystod y flwyddyn.

**Penderfynwyd –**

- **Nodi a chymeradwyo adroddiad blynyddol y Pwyllgorau Sgriwtini ar gyfer 2014/15.**
- **Bod Cadeirydd y Pwyllgor Sgriwtini Corfforaethol yn cael ei benodi fel yr Eiriolydd Sgriwtini o fis Mai 2015 hyd at fis Mai 2016 a Chadeirydd y Pwyllgor Sgriwtini Partneriaeth ac Adfywio o fis Mai 2016 hyd at fis Mai 2017. Wedi hynny byddai dau Gadeirydd y Pwyllgorau Sgriwtini yn cymryd rôl yr Eiriolydd Sgriwtini bob yn ail.**

## **13. ADRODDIAD BLYNYDDOL GWASANAETHAU DEMOCRATAIDD 2014-15**

Cyflwynwyd Adroddiad Blynyddol y Pwyllgor Gwasanaethau Democritaidd ar gyfer 2014/15 i'r Cyngor gan y Cynghorydd Vaughan Hughes fel Cadeirydd y Pwyllgor yn ystod 2014/15.

**Penderfynwyd derbyn yr adroddiad a nodi'r materion a drafodwyd fel rhan o Raglen Waith y Pwyllgor ar gyfer 2014/15.**

## **14. ADRODDIAD BLYNYDDOL ARWEINYDD Y CYNGOR**

Cyflwynwyd yr Adroddiad Blynyddol ar gyfer 2014/15 i'r Cyngor gan Arweinydd y Cyngor. Roedd yr adroddiad oedd yn seiliedig ar hunanasesiad corfforaethol y

Cyngor yn rhoi manylion ynghylch llwyddiannau'r Cyngor yn ystod y flwyddyn ynghyd â meysydd am welliant pellach, ac roedd hefyd yn nodi'r cynnydd a wnaed yn erbyn bwriadau'r Maniffesto Annibynnol.

Wrth gloi ei adroddiad, talodd yr Arweinydd deyrnged i'r Prif Weithredwr a fyddai'n ymddeol ddiwedd mis Mai 2015 a chyfeiriodd at y parch mawr oedd iddo oddi mewn i'r Cyngor a thu allan i Gyngor Sir Ynys Môn. Roedd Aelodau'r Cyngor yn eilio'r farn honno gan sôn am hygyrdd, cwrteisi a phroffesiynoldeb y Prif Weithredwr ynghyd â'r gwaith penigamp a gyflawnodd yn ei swydd. Mynegwyd gwerthfawrogiad hefyd i'r Cynghorydd R. G. Parry, OBE oedd yn sefyll i lawr fel Arweinydd yr Wrthblaid am ei gyfraniad i'r rôl honno.

Rhoddyd cyfle i'r Aelodau ofyn cwestiynau oedd yn codi o gynnwys yr adroddiad a gwnaed sylwadau oedd yn ceisio eglurhad ynghylch statws agweddau penodol o waith a phrosiectau'r Cyngor, ac ymatebodd yr Arweinydd i'r rhain.

### **Penderfynwyd derbyn Adroddiad Blynyddol Arweinydd y Cyngor ar gyfer 2014/15 a nodi ei gynnwys.**

#### **15. CAU ALLAN Y WASG A'R CYHOEDD**

Ystyriwyd a phenderfynwyd o dan Adran 100 (A)(4) Ddeddf Llywodraeth Leol 1972, gyrru'r wasg a'r cyhoedd allan o'r cyfarfod yn ystod y drafodaeth ar yr eitem a ganlyn, oherwydd y tebygrwydd y câi gwybodaeth ei rhyddhau a honno'n wybodaeth y gwna Atodlen 12A y Ddeddf eithriad ohoni fel y diffinnir y wybodaeth yn y Ddeddf ac yn y Prawf Budd y Cyhoedd sydd ynghlwm.

#### **16. ADOLYGIAD O'R UWCH DÎM ARWEINYDDIAETH**

- Cyflwynwyd argymhellion y Pwyllgor Penodi o'i gyfarfod a gynhaliwyd ar 1 Mai 2015 ynghylch yr uchod.
- Cyflwynwyd adroddiad y Prif Weithredwr i'r Cyngor. Roedd yr adroddiad yn cynnwys argymhellion diwygiedig ar gyfer symud ymlaen ag ailstrwythuro'r Uwch Dim Arweinyddiaeth yn dilyn ymatebion a dderbyniwyd fel rhan o'r ymgynghoriad ar Opsiwn 4 a ffafriwyd yn wreiddiol, ac yn seiliedig ar drafodaethau'r Pwyllgor Penodi a'r argymhellion a wnaed ganddo uchod.

Yn dilyn ystyried yr adroddiad a chael trafodaeth arno, cynigiwyd gwelliant i'r argymhellion er mwyn rhoi ystyriaeth i ail-ddynodi teitlau swyddi y ddwy swydd Prif Weithredwr Cynorthwyol newydd a gynigiwyd fel rhan o'r strwythur UDA diwygiedig. Yn y bleidlais ganlynol ar y mater, collodd y gwelliant o 16 pleidlais i 10. Mewn ail bleidlais, pasiwyd y cynigion gwreiddiol.

#### **Penderfynwyd –**

- **Cymeradwyo'r argymhellion yn adroddiad y Prif Weithredwr fel y'u cyflwynwyd.**



- **Awdurdodi'r Swyddog Monitro i ddiwygio Cyfansoddiad y Cyngor ar ôl cwblhau'r broses benodi / pan fydd y bobl a benodir yn cychwyn yn y swydd (pa un bynnag sydd hwyrach) er mwyn adlewyrchu'r strwythur rheoli newydd.**
- **Bod y penodiadau i'r ddwy swydd Prif Weithredwr Cynorthwyol newydd yn cael eu gwneud gan y Cyngor llawn ar ôl derbyn argymhellion y Pwyllgor Penodi ynglŷn â'r ymgeiswyr a ffafrir.**

## **17. CAU ALLAN Y WASG A'R CYHOEDD**

Dan Adran 100 (A)(4) Ddeddf Llywodraeth Leol 1972, gyrrwyd y wasg a'r cyhoedd allan o'r cyfarfod yn ystod y drafodaeth ar yr eitem a ganlyn, oherwydd y tebygrwydd y câi gwybodaeth ei rhyddhau a honno'n wybodaeth y gwna Atodlen 12A y Ddeddf eithriad ohoni fel y diffinnir y wybodaeth yn y Ddeddf ac yn y Prawf Budd y Cyhoedd sydd ynghlwm.

**Penderfynwyd mabwysiadu'r uchod.**

## **18. GWEITHREDU'R CYNLLUN ARFARNU SWYDDI A THÂL CYFARTAL**

Cyflwyno adroddiad y Pennaeth Proffesiwn Adnoddau Dynol.

Cylchredwyd nodyn cyngor i gadarnhau eto y risgiau sy'n gysylltiedig â gweithredu Statws Sengl, a chrynodeb o'r argymhellion, i bawb. Casglwyd y ddwy ddogfen ar ddiwedd y cyfarfod.

Cynigiodd Arweinydd y Cyngor bod y Cyngor yn cymeradwyo'r argymhellion oedd wedi'u cynnwys yn y crynodeb a gylchredwyd. Eiliwyd y cynnig gan y Cynghorydd Alwyn Rowlands.

Awgrymodd y Cynghorydd Hywel Eifion Jones bleidlais wedi'i chofnodi yn unol â'r broses a fabwysiadwyd yn y Cyngor llawn ar 7 Ebrill 2015.

### **Pleidleisiodd yr Aelodau a ganlyn o blaid:**

Kenneth P Hughes, Richard A Dew, Alwyn Rowlands, Vaughan Hughes, Jim Evans, Aled Morris Jones, William T Hughes, Derlwyn Hughes, Raymond Jones, Robert Llewelyn Jones, Peter Rogers, Gwilym O Jones, Meirion Jones, Dylan Rees, Ann Griffith, Carwyn Jones, John Griffith.

### **Pleidleisiodd yr Aelodau a ganlyn yn erbyn:**

Ni wnaeth yr un Aelod bleidleisio yn erbyn.

### **Ni wnaeth yr Aelodau a ganlyn bleidleisio ar ôl derbyn caniatâd arbennig:**

Robert G Parry OBE, Alun Mummery, Lewis Davies, Llinos Medi Huws, Jeffrey M Evans, Dafydd Rhys Thomas, Richard O Jones, Trefor Lloyd Hughes, Hywel Eifion Jones, Ieuan Williams, J Arwel Roberts.

**Penderfynwyd cymeradwyo'r argymhellion fel yr oeddent wedi eu hamlinellu yn y ddogfen grynodeb.**

Ar ddechrau cyfarfod y Cyngor gwnaed cais i ohirio cytuno ar gofnodion y cyfarfod a gynhaliwyd ar 7 Ebrill 2015. Cyfeiriodd Pennaeth Swyddogaeth Busnes y Cyngor/Swyddog Monitro at yr angen i gofnodion drafft y cyfarfod gael eu hystyried gan y Cyfreithwyr allanol sy'n cynghori'r Cyngor mewn perthynas â'r Statws Sengl ac roedd wedi gofyn i'r Aelodau ohirio cymeradwyo'r cofnodion er mwyn i'r swyddogion allu ymgynghori ag ymgynghorwyr cyfreithiol allanol y Cyngor. Cynigiwyd gohirio cytuno ar y cofnodion tan y cyfarfod nesaf.

**Penderfynwyd gohirio penderfyniad ynglŷn â chofnodion 7 Ebrill 2015 tan gyfarfod nesaf y Cyngor llawn.**

**Y CYNGHORYDD VAUGHAN HUGHES  
CADEIRYDD**